



Kamis, 26 Agustus 2021

Ogen: Kuan-kuanen 12:4



Keroulian Man Perbulangen



I bas doni enda nterem kalak si mehuli tapi lit si la muli, nterem kalak si rukur guna kiniulin kalak sideban lit ka nge si njuruken i bas perkadena pe. I bas kerina biak-biak jelma e, min kita Moria jadi kalak si mehuli dengen rukur guna kiniulin kalak si nterem. Biak-biak enda pe lit dengen jadi i bas jabu-jabuta. Hubungan perbulangen ras ndehara jadi sada iketen si luar biasa, si ipersada i bas sada padan, ngaloken sada ras sidebanna i bas kerina paksa dengen rukur ras ngelakoken si mehulina nandangi pasangenna.

Renungenta si isuratken i bas kitab Kuan-kuanen enda nuriken kerna hubungan ndehara ras perbulangen, kuga ndehara ncibalken dirina la saja arah perbahanen tapi pe perukureнна. Umumna perbahanen ntah pe tindakan sekalak jelma mbelih ulihna la saja guna dirina tapi pe man kalak sideban. Banci erbahan kalak sideban bangga, ipujiken tapi pe banci ka erbahan ceda gelarna. Bage me ikataken maka ndehara si mehuli kemulian ras keriahen man perbulangen, ertina malem ate perbulangenna erndeharaken ia. Terdauhen arah perbahanenna e tentunya la saja sindehara ipujiken tapi pe perbulangenna. Sendalanan ras si e tentunya lit ka nge biak ndehara si njuruken, subuk arah perbahanen ras pe pengeranana, si banci ncedaken dirina, perbulangenna bagepe kalak si isekelewetna. Biak sibage desken pinakit kangker, pinakit e pe banci enggo stadium 4, enggo mesera mpepalemca, arus ndalani operasi ntah pe ikemoterapi. Bage me iandingken kegeluhen perbulangen dikune biak ndeharana e njuruken ngenca.

Bagenda me i bas HUT Mamre enda iajuk kita terus menerus mpehuliken diri, guna keriahen perbulangen bage pe jadi persembahenta man Dibata. Malem ate Dibata dikune kita anak-anakna tetap nggeluh alu bujur ras mehuli.